

Mès djins,

Vo–nos–ci rachonés po l' dêrin côp d' l'anéye,
Lès–èlèves èt lès maïsses à l' sicole di walon ;
Saquantes qu'on–z–a priyî po l'zî d'ner one idéye
Di ç' qu'on pout fé, véci, tote one anéye au long.
Si dj' tin bin, c'èst l' sètyinme, qui dj' coneu, d' rinchinchète,
Mins dji v' pou garanti qu' c'èst nin co l' dêrin côp!
Si ça n' tèreut qu'à mi, dji r'ssine tot d' chûte po sèt',
Quite, à quatrè–vingts–ans, à passer por on fô ;
Tant qu'on n'a nin mètu on pîd dins nosse sicole
Po v'nu choûter nos maïsses qui donenut leûs lèçons,
Impossibe di trèveûy tot ç' qui compte dins leû role :
C'èst d' fé poûsser one plante à paurti d'on djaurnon.
Li mèstî d' maïsse, di–st–on, c'è–st–on mèstî qui paye!
Èt dji n' su nin véci po vos v'nu disminti ;
Djè l's–a tofêr vèyu bwâre èt mougî à r'laye
Su l' compte d'onk qu'a sès–ans, qu'a s' pension, sins rodji.
Mins dji vou bin wadjî qui l' pus grand d' leû bouneûr,
C'èst d' veûy qu'au mwès d'octôbe, gn–a one masse di novias,
– One façon d' lès r'mêrci, dè l'zî v'nu rinde oneûr –
Qu'apudront co l' walon, dès vîs èt dès djon.nias.
Paul, Ane–Marîye, Chantal, dj'a yeû l' timps d' vos conèche :
Vos m'avez tant ofri, dj'a si wêre rascoudu!
Vos–avez tant bouté po waîfî qu'on–z–è rèche.
C'èst bin grâce à vos trwès si dj' su là audjoûrdu
Po vos dîre qui, véci, chake di nos–ôtes mèsure
Tot ç' qui v's–avez sèmé, qui v's–avez fait flori ;
Gn–a qu'on mot qui convint, fait d' lètes di keûve qu'on r'chure
Avou tos vos–èlèves, tot simplèmint : Mèrci!

Bêrt